



Itilliarsoop ikerasaliortfigineqarnissaa piviusunngorteqqullugu Naalakkersuisut suliamik aallartitseqqullugit peqquneqarnissaannik Inatsisartut aalajangiiffigisassaattut siunnersuut. Ikerasaliaq Nordstar 30-imit assigisaanilluunniit aqputigineqarsinnaasunngorlugu isissusilerneqarlunilu silissusilerneqassaaq.

(Inatsisartunut ilaasortaq Anders Olsen, Siumut)

Siullermeernera

Inatsisartutnut ilaasortaq Anders Olsen, Siumut Naleqqamiit qutsavigerusuppatsigit kujataani imaatigut angallannikkut iluaqutaasussamik siunnersuuteqarninnut.

Siunnersuut ukiorpassuannortuni maani Inatsisartuni eqqartuiffigineqartarsimaqaaq taamatullu angallannikkut nassuiaterpassuartigut qaqilertuarneqarsimasuuvoq ilaatigut aamma 2019-imi Umiarsualiviit pillugit Nassuiaatip Inatsisartunut agguanneqarsimasumi misissorluarneqarsimaneramik oqaasertalerneqarluni tunngavilersuutigineqarpoq suliap nutaajunnginneranik.

Qinersiviup siuliani taamatuttaaq qaqilertaarneqarpoq ilaatigut Kujataaniit Inuit Ataqtigiinniit saqqummiunneqarmat siunnerfik pitsaasuunera tassani ersarilluinnartumik saqqummiussuuffigineqarluni.

Inuiaqtigiit kalaallit imaatigut angallanneq annertoorujussuarmik ingerlataraarput allaat inuunitsinnut ilaalluinnartuuvoq nunatsinni sumiikkaluaruttaluunniit, imaatigut sumiiffimmiit sumiiffimmut nikittuarnertigut inuiaqtigiit ataqtigiinnitsinnut pingaaruteqartorujussuullutik.

Taamaamat nunatsinni imaatigut angallannermi isumannaallisaanikkut pisariillisaanerillu ingerlannerisigut pitsanngorsaanissat tupinnangitsumik maani inersuarmi ukiorpassuannortuni eqqartuiffigineqartarput ilaatigut uani siunnersuummi pineqartoq ikerasaliornissaaq.

Nunatsinni ikerasaliornikkut sumiiffinni arlaqartuni innuttaasut nunat iluisigut umiatsiamik isumannaanerusumik angalanissamik periarfissarsiornissaat Naleqqamiit pingaartutut isigaagut.



Imaatigut umiatsiamik angallannikkut isumannaallisaanerit ikerasaliaannaanngillat, immap assingi ullutsinnut naleqqussarsimasut, naaralaartitsiviit, imarsiortunut nalunaaqutsiussat taamatullu aamma umiarsualiveqarnikkut pitsanngorsaaniissat suliassaapput ukiorpassuangortuni eqqarneqartarlutik. Ilaatigut Namminersorlutik Oqartussat umiarsualiviutaasa aserfallatsaaliorneqarsimannginneri pillugu Nalunaarusiaq agguanneqarsimasuni takusinnaavarput unamminartorpassuit assigiinngitsut akissaqartittariaqakkagut qanorlu iliuseqarfigisariaqakkagut. Nalunaarusiarlu ilaatigut nalunngikkaluarlutigit tupannarsinnaasunik imaqarput soorlu isumannaallisaaneq patsisaalluni allaat Aasianni Maniitsumilu umiarsualiviit matoratarsinnaanerit atuarlugit tupannartuupput.

Taamaamat Naalackersuisooqatigiinni peqataanitsinni aningaasartuutitaqartussaasorpasuarunik ukiorpassuangortuni pilersaarusiorluarnikkut tulleriaarinissat ingerlannissat aningaasalersornissaallu avaqqussinnaanatigit inissisimavugut ilungersornartorujussuarmik unamminartumillu akisussaassuseqartumik qanoq iliuseqarfigisariaqakkatsinnik.

Tulleriaarinerit assigiinngitsut pingaarnersiulluni suliassat imaaginnavipput uani siunnersuutigineqartumi iluatinnarluinnartumi suliaq itigartillugu kivititsiinnarnissaq uggoraarput akissaqarnerput eqqarsaatigalugu tulleriaarisariaqarnerup kingunerisaanik Naalackersuisut itigartitsinissamik innersuussimmata.

Naleqqamiit kujataa kujataanilu innuttaasut sumiginnagaallutillusoq inissinneqaqqittarnerat nalilersuinitisinni ilaatissimavarput. Itilliarsoq ikerasaliornertigut kujataani angalaneq isumannaanerulernissaanik aammalu sikorsuit takkuttuarmata takkunnerini angallannikkut pisariinnerusumik sumiiffimmiit sumiiffimmut angalasinnaanerannut, naatsumik ulluinnarni inuunerannut pingaaruteqarmat itigartiinnarnagu sanaartornermut ataatsimiititaliami nalilersorluarneqarnissaa Naleqqamiit kissaatigaarput aningaasalersorneqarsinnaanera piinnarnagu ukiumiit ukiumut naafferartumik sularisarlugu aqqikkiartorneqarsinnaanera ilanngullugu ikerasannornissaa nalilersortikkusupparput.

Taamatut oqaaseqarluta siunnersuut ataatsimiititaliami nalilersuiffigilluarneqarnissaa innersuussutigaarput